

comme vn ange du Ciel, et apres auoir assemblé par diuerses fois les Chef de la nation auec tous les anciens po⁹ ietter dans leurs esprits les premieres semences de l'euangile; apres auoir porté les Instruc-tions dans les Cabanes qui se trouuoient tousjours plaines d'une grande foule de peuples, il prit resolu-tion de parler a tous publiquement dans vne assem-blée g^{nale} qu'il conuoqua en plaine Campagne, les Cabanes estant trop estroites po⁹ tout le monde. ce fut vne belle prairie proche du bourg qu'on Choisit pour ce grand Conseil, et qu'on orna a la facon du païs la Couurant de nattes et de peaux d'ours, et le p. ayant faict estendre sur des Cordes diuerses pieces de taftas de la chine, il y atacha quatre grandes Images de la s^{te}. Vierge qui estoient veües de tous Costés. L'auditoire estoit Composé de 500 tant de chefs que de vieillards assis en rond a l'entour du pere et de toute la Jeunesse qui se tenoit debout au nombre de plus de 1500 ho^{es}. sans compter les femmes et les enfans qui sont en grand nombre, le bourg estant Compose de 5 a 600 feux. Le pere parla a tout le peuple, et leur porta 10 paroles par dix presents qu'il leur fit, leur expliqua les principaux mysteres de nostre Religion, et la fin po⁹ laquelle il estoit venu en leur païs; sur tout il leur precha J. C. la veille mesme (de ce grand iour) qu'il estoit mort en Croix, po⁹ eux aussi bien que po⁹ tout le reste des ho^{es}. et dit ensuite la s^{te}. messe. trois Jours apres qui estoit le dimanche de pasques les choses estant disposées de la mesme maniere que le Jeudy, il celebra les s^{ts}. misteres po⁹ la 2^{de}. fois Et par ces deux sacrifices qu'on y eut iamais offerts a dieu, il prit possession de cette terre au nom de J. C. et donna